

**На хвалитех стихиры, глас 8: Подобен: О преславнаго чудесе!**

- 1. Стих:** Хвалите Его на силах Его,/ хвалите Его по множеству величествия Его.
- 2. Стих:** Хвалите Его во гласе трубнем,/ хвалите Его во псалтири и гуслех.

**О пресла́внаго чудесе!// Священную главу, и ангелом говейную,/ нечистая блудница ношаше отрокови́ца,/ обличившую деяние беззако́нно, прелюбодейце ма́тери принесé./ О неизрече́ннаго Твоего терпения Человеколю́бче!// Имже, Христе, спаси души на́ша,// я́ко Един Благоутро́бен. [Дважды]**

- 3. Стих:** Хвалите Его в тимпане и лице,/ хвалите Его во струнах и органе.

**О Иродова окаменения!// Обезчестивый Бога законными преступле́ньми,/ клятвы соблюдением лестне лицемерствует,/ и к прелюбодеянию убийство прилагает, сетовати творяйся./ О неизглаго́ланнаго Твоего милосердия Влады́ко!// Имже Христе спаси души наша,// я́ко Един Благоутро́бен.**

- 4. Стих:** Хвалите Его в кимвалех доброгласных, хвалите Его в кимвалех восклицаня./ Всякое дыхание да хвалит Господа.

**О паче ума удивления!// Пророков печать, земный а́нгел,/ блудному плясанию показу́ется цена,/ богословный язык, предпосылается и сущим во аде Христов провозвестник./ О несказаннаго Твоего промышления Влады́ко!// Имже, Христе, спаси души наша,// я́ко Един Благоутро́бен.**

**Слава, глас 6:**

**Паки Иродиа бесится, паки смущается./ О плясания льстивнаго, и пира с ле́стиею!// Креститель усека́шеся,/ и Ирод смуща́шеся./ Молитвами, Господи, Твоего Предте́чи,// мир пода́ждь душам на́шим.**

**И ныне, Богородичен:**

**Богородице, Ты еси лоза и́стинная,/ возрастившая нам пло́д живота,/ Тебе молимся молися Влады́чице,/ со святыми апо́столы,// поми́ловатися душам на́шим.**

## По Славословии, Тропарь Предтечи, глас 2:

**Па́мять праведнаго с похвала́ми,/ тебе́ же довлеет свидетельство Господне, Предте́че:/ показа́л бо ся еси воистинну и пророков честне́йший,/ я́ко и в струях крестити сподобился еси Проповéданнаго./ Те́мже за истину пострадав ра́дуясь,/ благовести́л еси и сущым во аде Бога являшагося плóтию./ Взéмлющаго грех ми́ра,// и подающаго нам велию ми́лость.**

### Слава и ныне:

**Вся паче смýсла,/ Вся преславная Твоя, Богородице, та́инства,/ чистоте́ запечатанной, и девству храни́му,/ Ма́ти позналася еси нелóжна,/ Бо́га рождши и́стиннаго;// Того моли спастися душáм нашим.**

### На Литургии:

**Блаженна от канона 1-го, песнь 3-я, на 4: и 2-го, 6-я на 4.**

## По входе [в Троицком храме]: Тропарь, глас 8:

**Благословен еси Христе Бо́же наш,/ Иже премудры ловцы́ явлей́,/ низпослав им Духа Свята́го,/ и теми уловлей вселénную,// Человеколю́бче сла́ва Тебе.**

### Тропарь Предтечи, глас 2:

**Па́мять праведнаго с похвала́ми,/ тебе́ же довлеет свидетельство Господне, Предте́че:/ показа́л бо ся еси воистинну и пророков честне́йший,/ я́ко и в струях крестити сподобился еси Проповéданнаго./ Те́мже за истину пострадав ра́дуясь,/ благовести́л еси и сущым во аде Бога являшагося плóтию./ Взéмлющаго грех ми́ра,// и подающаго нам велию ми́лость.**

### Слава: Кондак Предтечи, глас 5.

**Предтечево славное усекновéние,/ смотрение бысть некое Божéственное:/ да и сущим во аде Спасово проповесть пришéствие./ Да рыда́ет убо Иродиа́,/ беззакóнное убийство испроси́вши:/ не закóн бо Божий, ни живый вéк возлюбí,// но притво́рный, привре́менный.**

## И ныне: Кондак Троице, глас 8:

**Егда** снизшед язы́ки слия́,/ разделяше языки Вы́шний:/ егда же огненныя языки раздая́ше,/ в соединение вся́ призва́,// и согласно славим Всесвятаго Ду́ха.

**Прокимен, глас 7: Возвеселится праведник о Господе,/ и уповаает на Него.**

**Стих: У**слыши, Боже, глас мой, вегда молити ми ся к Тебе.

**Аллилуиа, глас 4: Праведник** яко финикс процветет, яко кедр иже в Ливане, умножится.

**Причастен: В** память вечную будет праведник: от слуха зла не убоится.

На трапезе утешение братии, кроме сыра и яиц и рыбы. Ядим же дважды днем, аще среда, или пяток.

Зри Ведомо же буди, яко аще случится праздник сей в неделю, предваряет вся служба воскресна на вечерни и на утрени, и на литургии.

Зри постнаго сего устава на усекновение честныя главы Предтечевы, древними святыми отцы в сей день завещаннаго.

Суть убо неции предают качеству быти тогда снедей, а не посту: о том бо не возмогахом ничтоже обрести написано в различных типичех. Но паче достоин в той день всяко воздержатися постом, пострадавшаго ради за истину пророка, и проповедавшаго во аде Господа: разрешению же быти точию на деревяное масло, и прочая от различных овощнаго плода: и по мере единой чашице вина в славу Божию, труда ради бденнаго. Всяко бо достоин нам в той день сетованием унылым быти, а не чревоугождение имети воздержательнаго ради жития святаго, и скверноубийственнаго кровопролития его от Ирода: понеже усечена бысть глава Предтечева на пиру плясанием блудныя плясавицы, и чревоугодием и различных животных закланием и кровопролитием нам же ни единого от таковых животных, из нихже кровь изливается, но ниже рыб [кровь бо имеют, аще и в воде жительствуют, и от тварей животных суть] подобает вкушати: да не сообщницы явимся Иродову чревоугодию. Како бо Крестителево честное усекновение почтити восхощем? Мясо ли хощем ясти, или от иных различных брашен многоценных? А он живяше в пустыни безводней, и безтравней, ни хлеба ядыше, ни трапезы имяше. Вино ли прием? А он никогдаже пияше вина, или инаго пития мирскаго, ни в храмах живяше, но под камнем вкопався живяше. Стол, и трапеза, и одр ему бяше земля, разве ради нужды естественныя единою днем вкушаше акриды, и мед дивий: чаша же ему пригорщи бяше, а питие из камене текущая вода. Темже братие усердно почтим день сей молитвою и постом в целомудрии, отбежим пьянственнаго сего злаго нрава: аще бо кто неверствием одержимъ будет, и узаконеннаго сего многоразсудительнаго повеления не сохранит, таковой зле пагубныя напасти постраждет. Право содержащих же подвиг сей, Господи, благослови, и управи молитвами святаго Предтечи.